

8.47.5

*Imp. Diocletianus et Maximianus AA. Donatio.*

Filia tua non solum reverentiam, sed et subsidium vitae ut exhibeat tibi, rectoris provinciae auctoritate compelletur.

*PP. k. Mart. Diocletiano III et Maximiano AA cons.* [a. 287]

8.47.6

*Idem AA. Hermogeni.*

Abdicatio, quae Graeco more ad alienandos liberos usurpabatur et apoceryxis dicebatur, Romanis legibus non comprobatur.

*PP. XVII k. Dec. Maximiano A. II et Ianuario cons.* [a. 288]

8.47.7

*Idem AA. et CC. Duplianae.*

Si maritus tuus, licet militans, in patria potestate constitutus filium legitimis suscepit nuptus, eum in potestate avi perseverasse non ambigitur.

*S. prid. non. April. CC. cons.* [a. 294]

8.47.8

*Idem AA. et CC. Aemiliana.*

Libertos exemplo ingenuorum filios suos post libertatem ex legitimis nuptiis natos in potestate habere non est prohibitum.

*S. XVI k. Mai. Sirmi CC. cons.* [a. 294]

8.47.9

*Idem AA. et CC. Nicagorae.*

Nec filium negare cuiquam esse liberum senatus consulta de partu agnoscendo ac denunciata poena, item praeiudicium edicto perpetuo propositum et remedium alimentorum apud praesidem maiori trimo petenti monstratum iure manifesto declarant.

*S. V k. Mai. Sirmi CC. cons.* [a. 294]

8.47.10

*Imp. Constantinus A. ad Maximum pu.*

Libertati a maioribus tantum impensum est, ut patribus, quibus ius vitae in liberos necisque potestas olim erat permissa, eripere libertatem non liceret.

*D. XV k. Iun. Thessalonicae Severo et Rufino cons.* [a. 323]